

# Katerisimaartarnernut, ininut kikkunnit tamanit iserfigineqarsinnaasunut assartuutinullu killilersuigallarnerit pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6, 12 a aamma 12 b, aamma § 29, imm. 2 malillugit aalajangersarneqarpoq:

## *Atuuffiata killilernerqarnera*

**§ 1.** Nalunaarummi §§ 2-5 katersuunnernut naalakkersuinikkut allatulluunniit isummersornissamik siunertalinnut atuutinnigillat.

*Imm. 2.* Nalunaarummi § 6 napparsimavinnut, nakorsiartarfinnut kiisalu nakorsiartarfinnut namminersortunut niuertarfinnilu peqqissaanermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinnigilaq.

*Imm. 3.* Nalunaarut ulluunerani neqeroorutunut namminersortunut pisortaniillu pigineqartunut, atuarfinnut, ilinniarfeqarfinnut il.il. atuutinnigilaq, nappaatit tunillaassortut akiorniarlugit iliuutsit pillugit Inatsisartut peqqussutaanni § 22 takuuk.

*Imm. 4.* Nalunaarut eqqartuussisunut atuutinnigilaq.

## *Aaqqissuussinernik il.il., peqataaniarnermi t nunanit allanit angalaqqaarluni peqataaffigineqarsinnaasunik inerteqquteqarneq*

**§ 2.** Illup iluani silamilu aaqqissuussanik, nalliuttorsiornermik, sammisaqartitsinernik assigisaannilluunniit ingerlataqarnerit, nalinginnaasumik aaqqissuussanut, nalliuttorsiornermut, sammisaqartitsinernut assigisaannilluunniit peqataaniarnermi nunanit allanit angalaqqaarluni peqataaffigineqarsinnaasut taamatulluunniit naatsorsuuteqarfigineqartut inerteqqutaapput, taamaattorli imm. 2, 3 aamma § 3 takukkit.

*Imm. 2.* Aaqqissuussani, nalliuttorsiornermi, sammisaqartitsinerni assigisaannilluunniit peqataanissamut nalunaarnissamik piumasaqaatilinni inuit nunanit allaneersut aaqqissuussamut, nalliuttorsiornermut, sammisaqartitsinernut assigisaannilluunniit peqataasussatut nalunaarsorsinnaannginnissaat aaqqissuussisup qulakkiissavaa. Imm. 1 malinneqarpat, taava aaqqissuussaq, nalliuttorsiorneq, sammisaqartitsineq assigisaannilluunniit ingerlataq ingerlanneqarsinnaavoq.

*Imm. 3. Pikkorissartitsinerit, isumasioqatigiinnerit assigisaallu imm. 2-mi ilaapput.*

*Imm. 4. Namminerisamik aaqqissuussinerit, soorlu kuisitsinerit, inuuissiornerit, apersortinnerit, soraarummeertoqarneranut atatillugu nalliuttorsioritsinerit, katinnerit ilisinerillu imm. 1-imi ilaanngillat. Namminerisamilli aaqqissuussinerit § 4, imm. 1-imi aamma § 5, imm. 1-imi ilaapput.*

*Aaqqissuussinernut il.il kommuninit allanit angalalluni peqataaffigineqartussanut piumasaqaatit*

**§ 3.** Illup iluani silamilu aaqqissuussat, nalliuttorsiornerit, sammisasaqartitsinerit assigisaalluunniit, kommuninit allaneersunit peqataaffigineqartut, taamaallaat piumasaqaatit tulliuttut malinneqarpata ingerlanneqarsinnaapput:

- 1) Aaqqissuussineq il.il. Nunatta avataaniit Kalaallit Nunaannut angalanermi piumasaqaatit pillugit Namminersorlutik Oqartussat nalunaarutaanni § 12, imm. 1 naapertorlugu tikittarfimmi aalajangersimasumi pisussaappat.
- 2) Aaqqissuussineq il.il. sioqqullugu ulluni 30-ni illoqarfimmi aaqqissuussamik ingerlatsiffiusussami Covid-19-imik tunillatsittoqarsimanngippat.

*Imm. 2. Aaqqissuussami il.il. inuit 50-it sinnerlugit peqataassappata aaqqissuussinerup il.il. ingerlanneqarnera sioqqullugu tamanna Nunatta Nakorsaaneqarfianit akuersissutigineqarpat. Akuersissuteqarnissamut atatillugu Nunatta Nakorsaaneqarfia piumasaqaatinik aalajangersaasinnaapput.*

*Imm. 3. Ullut kingulliit 14-it iluanni nunamut maanga tikissimagaanni imaluunniit meterit marluk iluanni inunnik ullut 14-it iluanni nunamut maanga tikissimasunik attaveqateqarsimagaanni aaqqissuussamut il.il. peqataanissaq imaluunniit najuunnissaq inerteqqutaavoq.*

*Imm. 4. Aaqqissuussamut il.il. peqataasut tamarmik peqataaernerup kingorna angerlannginnerminni misissortissapput, illoqarfimmi Covid-19-imik tunillatsittoqarsimasoq paasineqarpat.*

*Imm. 5. Aaqqissuussamik il.il. aaqqissuussisuusup aaqqissuussap il.il. nalunaarummi matumani malittarisassat tamaasa naapertorlugit ingerlanneqarnissaa qulakkiissavaa.*

*Imm. 6. Pikkorissarnerit, isumasioqatigiinnerit assigisaallu imm. 1-mittaaq ilaapput.*

*Imm. 7. Namminerisamik aaqqissuussinerit, soorlu kuisitsinerit, inuuissiornerit, apersortinnerit, soraarummeertoqarneranut atatillugu nalliuttorsioritsinerit, katinnerit ilisinerillu imm. 1-imi ilaanngillat. Namminerisamilli aaqqissuussinerit § 4, imm. 1-imi aamma § 5, imm. 1-imi ilaapput.*

*Imm. 8. Nunatta Nakorsaaneqarfia imm. 1-5-mut immikkut akuersissuteqarsinnaavoq, pissutsinik piviusunik tamanna tunngavilersorneqarsinnaappat.*

*Illup iluani aaqqissuussinerni il.il. peqataasinnaasunut killilersuineq*

**§ 4.** Illup iluani aaqqissuussinerit, nalliuttorsiornerit, sammisaqartitsinerit assigisaalluunniit amerlanerpaamik inunnik 100-nik peqataasoqaqqusaapput, § 6-imullu naapertuussallutik.

*Imm. 2. Aaqqissuussisoq aaqqissuussamut, nalliuttorsiornermut, sammisaqartitsinermut assigisaannulluunniit inuit kommuninit nunanilluunniit allanit peqataanissaannut toqqaannartumik kajumissaarissanngilaq. § 3 naapertorlugu aaqqissuussaq ingerlanneqassappat, inuit kommuninit allanit aaqqissuussinermut il.il. peqataanissaannut kajumissaarineq inerteqqutaanngilaq.*

*Silami aaqqissuussinerni il.il. peqataasinnaasunut killilersuineq*

§ 5. Silami aaqqissuussinerit, nalliuttorsiornerit, sammisaqartitsinerit assigisaalluunniit amerlanerpaamik inunnik 250-inik peqataasoqaqusaapput.

*Imm. 2.* Aaqqissuussisoq aaqqissuussamut, nalliuttorsiornermut, sammisaqartitsinermut assigisaannulluunniit inuit kommuninit nunanilluunniit allanit peqataanissaannut toqqaannartumik kajumissaarissanngilaq. § 3 naapertorlugu aaqqissuussaq ingerlanneqassappat, inuit kommuninit allanit aaqqissuussinermut il.il. peqataanissaannut kajumissaarineq inerteqqutaanngilaq.

*Ininut kikkunnilluunniit iserfigineqarsinnaasunut piumasaqaatit*

§ 6. Inuussutissarsiummik ingerlatallit aamma suliffeqarfiit pisortanit pigineqartut ininik kikkunnit tamanit iserfigineqarsinnaasunik pigisallit piumasaqaatinik makkuninnga naammassinnissimassapput:

- 1) Inuit ininut qatserisartoqarfinni oqartussaasunit akuerineqarsimasunut isersinnaatitaasut amerlanerpaaffissaasa affaannaat isersimaqqusaapput. Inini qatserisartoqarfinni oqartussaasunit akuersissutitaqartinneqanngitsuni, natermi 4 m<sup>2</sup>-iusumi amerlanerpaamik inuk ataasiinnaaqqusaavoq. Nateq 4 m<sup>2</sup>-imit mikineruppat oqaaseqatigiit aappaat apeqqutaatinnagit inuup ataasiinnaanissaa akuerineqarsinnaavoq. Nateq oqaaseqatigiit aappaanni pineqartoq qanoq pequteqartiginera apeqqutaatinnagu iikkamiit iikkamut naatsorsorneqassaaq.
- 2) Ajornanngippat init imatut pequsersorsimassapput suliffeqarfillu imatut ingerlanneqassallutik tuniluunnissaq minnerpaaffianiitinneqassalluni, tassunga ilanngullugu pisisartut pulaartullu imminnut qanillinninnissaat periarfissaqartillugu.
- 3) Inimi ininiluunniit tamanit iserfigineqarsinnaasuni eqqilusaarnissaq ileqqorissaarnissarlu pillugit Nunatta Nakorsaaneqarfianiit paasissutissanik nivinngaasoqassaaq.
- 4) Sulisut tamarmik Nakorsaaneqarfiup eqqiluisaaqqissaarnissamik ileqqorissaarnissamillu innersuussutaanik malinninnissaat qulakkeerneqassaaq.
- 5) Pisisartunut pulaartunullu ajornanngippat imermik qaqorsaammillu imaluunniit assammut spritimik peqassaaq.
- 6) Nerisassanik poortorneqarsimanngitsunik tuniniaanermi sulisut aaqqateqassapput.

§ 7. Inuussutissarsiummik ingerlatalik politiit naliliinerat malillugu § 6-imik unioqqutitsisimappat, inuussutissarsiummillu ingerlatalik § 6-imik malinninnissaa ilimagineqanngippat, inuussutissarsiummik ingerlatalik inip piffissami aalajangersimasumi tamanut matoqqatinnissaanik politiinit peqquneqarsinnaavoq.

*Assartuutinut piumasaqaatit*

§ 8. Assartuutit issiaffiusinnaasut sinnerlugit ilaasoqaqqusaanngillat. Oqaaseqatigiinnik siullernik eqqortitsinissaq assartuummik piginnittup akisussaaffigaa.

*Pineqaatissiissuteqartarnej*

**§ 9.** Aaqqissuussisut §§ 2-5-inik unioqutitsisut pinerluttulerinermik inatsit malillugu pineqaatissinneqarsinnaapput.

*Imm. 2.* § 3, imm. 2-5-mik aammalu §§ 6 aamma 8-mik unioqutitsisoq imaluunniit § 7 malillugu peqqussummik unioqutitsisoq pinerluttulerinermik inatsit malillugu pineqaatissinneqarsinnaavoq.

*Imm. 3.* Ingerlatseqatigiiffiit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

*Imm. 4.* Akileeqqusissutit Nunap Karsianut tutsinneqassapput.

*Atuutilersitsineq, atorunnaarsitsineq piffissarlu atuuffissaq*

**§ 10.** Nalunaarut 16. februar 2021-mi atuutilissaaq.

*Imm. 2.* Ilutigisaanik Katerisimaartarnernut, ininut kikkunnit tamanit iserfigineqarsinnaasunut assartuutinullu killilersuigallarnerit pillugit Namminersorlutik Oqartussat nalunaarutaat nr. 2, 4. januar 2021-meersoq atorunnaarsinneqarpoq.

*Imm. 3.* Nalunaarut malillugu killilersuinerit, inerteqquteqarnerit, peqqusinerit il.il. 18. april 2021 ilanngullugu atuutissapput.

*Imm. 4.* Inuit ulloq 20. juni 2020 sioqqullugu § 2, imm. 2 aamma § 3-mi allaaserineqartut naapertorlugit aaqqissuussanut, nalliuttorsiornerit sammisassaartitsinernut assigisiaannulluunniit peqataaniarlutik nalunaarsorsimasut taakkununga peqataasinnaapput

*Namminersorlutik Oqartussat, ulloq 15. februar 2021*

Martha Abelsen

/

Tine Pars

**Namminersorlutik Oqartussat**  
Imaneq 4  
3900 Nuuk  
E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut